

# KHOMESHENARA YA SARS E TOBOKETSA TABA E MABAPI LE IKONOMI E SENG MOLAONG KETSAHALONG YA KETEKO YA LETSATSI LA MATJHABA LA BOLAODI BA MEEDI

**PRETORIA, Labohlano la 24 Pherekong 2020** – Kajeno Ditshebeletso tsa Lekgetho tsa Afrika Borwa (SARS) di bile le ketsahalo ya ho keteka Letsatsi la Matjhaba la Bolaodi ba Meedi, e leng ketsahalo e tshwarwang ho phatlalla le lefatshe ka la 26 Pherekong selemo ka seng.

Monongwaha, mookotaba, e leng o kgethwang ke Mokgatlo wa Lefatshe wa Bolaodi ba Meedi (WCO), o re “Customs fostering sustainability for People, Prosperity and the Planet” / Bolaodi ba Meedi bo kgothaletsang tswelopele ya Batho, Nala le Polanete”.

Selemo ka seng Letsatsi la Matjhaba la Bolaodi ba Meedi (ICD) le tshwarwa ka la 26 Pherekong e leng letsatsi leo Lekgotla la Tshebedisano ya tsa Bolaodi ba Meedi (CCC) le ileng la kgakola seshene ena ka lona ka 1953. CCC e ananetse lebitso lena la tshebetso, la Mokgatlo wa Lefatshe wa Bolaodi ba Meedi / World Customs Organisation (WCO) ka 1994. Selemo ka seng, letsatsi lena le ketekwa ho phatlalla le lefatshe mme mookotaba o kgethwa ke Bongodi ba WCO mme bo tsebiswe Ditho tsohle tse 180 tsa WCO.

Khomeshenara ya SARS, Edward Kieswetter, ha a tshetleha puo ya hae ya sehlooho, o buile ka moo mookotaba o leng bohareng ba tema eo Bolaodi ba Meedi bo e kgathang ho sireletsa setjhaba, ho tsamaisa tsa kgwebisano le ho tshehetsa kgolo le tshetsopele ya ikonomi, mmoho le ho sireletsa tikoloho.

Ho latela dintlha tsa taba ya pele, ke hore tshireletso ya setjhaba, Khomeshenara o buile ka matsapa a SARS a ho shebana le ho tsamaiswa ha dithoto le batho ntle le molao ho phatlalla le madiboho a rona (ikonomi e seng molaong).

O boletse hore Yuniti e thehilweng botjha ya Ikonomi e seng molaong, e neng e tsepamisitse maikutlo hodima diketsahalo tse seng molaong tse kang ho mokolwa ha kwae, dithomello kahare ho naha tse seng molaong, dithoto tsa mokokotelo, jwalo-jwalo, e tlo sebetsa ka katamelo le diakgente tse ding tse kang NPA, le hore e se e qadile ho ba le dikatleho tse itseng. Tsena di se di fihlelletse bokaalo ba R 2.6 billion ba makgetho a fumanweng hape haesale ho tloha ka la 1 Mmesa 2019.

“Le ha ho fumanwa hape ha lekgetho e le hwa bohlokwa ho arabela ikonomi e seng molaong, re se re phethile habedi matsapa a rona a ho hapa le ho tlosa dihlahiswa tse seng molaong mebarakeng, mme sena se nyopisitse tshebetso ya bao ba lomahantseng meno ho tella melao le melawana ya rona.”

O boletse hore ke maikemisetso a SARS ho ba le kutlwisiso e ntlafetseng ya ikonomi ena e seng molaong, ka ho etsa jwalo, re tla tseba ho ba le bokgoni bo hlokehang ho matlafatsa mananeo a teng ho shebana le yona ho latela thomo ya SARS.

Ho na le tlhokeho ya bohlokwa ya ho shebana le diketsahalo tsohle tse seng molaong tse seng di fihlelletse bonokwane bo sa amoheleheng. SARS jwalo ka mmoloki wa lesedi la sephiri, e hlokometse ho ata ha diketsahalo tsa bonokwane tse tobileng diofisiri tsa yona, tse akgang ka hare ho utsuwa ha lesedi la sephiri le ho di-laptop tsa bona. Ho sa natswe diketsahalo tsena tsa bonokwane, mokgwatshebetso o sa ntse o sireletsehile mme lesedi la rona le ntse le bolokehile. Ka lebaka la sena ho hlakile hore ho bohlokwa haholo ho lwantshana le diketsahalo tsena tsa bonokwane.

- Puo ya Khomeshenara e ka fumanwa [mona](#).
- Ho fumana pehelo e ileng ya pepeswa Letsatsing la Matjhaba la Bolaodi ba Meedi e mabapi le ikonomi e seng molaong, [tobetsa mona](#).